

摘藻堂四庫全書薈要

史部

欽定四庫全書薈要

史部

通典卷一百二十

六至
八

詳校官員外郎臣潘紹觀



欽定四庫全書薈要卷九千二百四十四

史部

通典卷一百二十六

唐 京兆 杜佑 君卿 纂

 禮八十六 開元禮纂類二十一 嘉五

皇太子加元服

告太廟 先期如常告之儀

臨軒命賓贊

所司先奏請司徒一人為賓卿一人為贊員冠吏部承以

戒之前一日尚舍奉御整飭御幄於太極殿衛尉設羣臣朝集使諸蕃客次於左右朝堂太樂令展宮懸之樂於殿庭設舉麾位於殿上一位於懸下鼓吹令設十二案乘黃令陳車輅尚輦奉御陳輿輦典儀設文官一品以下五品以上位於橫街之北西面北上諸州使人五品以上合班六品以下位於橫街南諸州使人六品以下諸蕃客又在南皆西面北上設武官五品以上位於橫街北東面北上諸州使人五品以上合班諸親位於

其南六品以下位於橫街南諸州使人六品以下及蕃客等又於其南皆東面北上設典儀位於懸之東北贊者二人在南少退俱西向設賓受命位於橫街南道東北面贊者位又於其後少東北面奉禮郎設門外文官一品以下位於順天門外道東每等異位重行西面武官一品以下位於門西每等異位重行東面並以北為上其日諸衛勒所部列黃麾仗如常儀羣臣各依時刻集朝堂俱就次各服其服侍中量時版奏請中嚴協律

郎太樂令帥工人就位諸侍衛之官各服其器服奉迎
典儀帥贊者先入就位通事舍人引先置羣官入立定
又引賓贊入立於太極門外道東西向黃門侍郎引主
持節中書侍郎引制書案立於樂懸東南面西北上侍
中版奏外辦皇帝服通天冠絳紗袍以出曲直華蓋警
蹕侍衛如常儀皇帝將出仗動太樂令令撞黃鍾之鐘
右五鐘皆應協律郎舉麾鼓祝奏太和之樂皇帝升輿
出自西房即御座南向坐符寶郎奉寶置於御座樂止

通事舍人引賓贊入就位賓贊初行入門舒和之樂作
至位樂止立定典儀曰再拜侍中及舍人前承制侍中
降至賓前稱有制公再拜將加冠於某之首公其將事
公少進北面再拜稽首辭曰臣不敏恐不能供事敢辭
侍中拜奏又承制降稱制旨某公將事無辭公再拜退
復位侍中退舍人至卿前稱勅旨卿再拜將加冠於某
之首卿宜贊冠卿再拜舍人退黃門侍郎引主節至賓
所主節授黃門侍郎黃門侍郎執節立於賓東北面賓

再拜受節付主節訖又再拜主節立於賓後黃門侍郎
退中書舍人引制書案至賓所取制書在賓東北西面
立賓再拜受制書執立又再拜持案者立於賓後中書
侍郎退典儀曰再拜贊者承傳羣官在位者皆再拜舍
人引賓贊出賓贊初行樂作出門樂止侍中前跪奏稱
侍中臣某言禮畢俛伏興還侍位皇帝興太樂令令撞
蕤賓之鐘左五鐘皆應鼓祝奏太和之樂皇帝降座侍
衛警蹕如來儀入自東房樂止舍人引一品以下以次

出初賓贊出門賓以制書置於案升車從輅而行威儀鼓吹詣東宮降輅入次賓贊具服其一品以下以次出蕃客各還館九品以上詣東宮朝堂次服其服就位如冠儀

冠

前一日衛尉設賓次於重明門外道西南向贊冠次又於其西南向並鋪床席又於重明門內道西施一次擬會賓贊設文武羣官九品以上及羣親并宮臣次如常

儀奉禮設文武羣官九品以上諸親在五品之下及宮臣外位如常儀設殿庭位文武羣官共典儀共宮臣合班諸親在五品下文官在東西面武官在西東面皆以北為上又設皇太子位於閣外道東西向設三師位於閣外道西三少位於三師之南少退東向典儀又設皇太子受制位於樂懸北北面所司設軒懸之樂於殿庭又設舉麾位於庭上一位於懸下有司設皇太子羽儀車輿於殿庭如常儀典設郎帥其屬鋪解劍席於懸之

東北冠日平明宮臣皆朝服非宮臣者公服三師三少

公服並集於重明門外次宗正卿乘犢車侍從詣左春

坊權停左右二率各勒所部屯門列仗左庶子版奏請

中嚴工人及諸行事之官各入就位奉禮郎設壘洗於

東階東南壘在洗東篚在洗西南肆

篚實爵加巾幕

典設郎鋪

皇太子冠席於殿上東壁下近南西向設賓席於西階

上東向設主人席於皇太子席西南西向設三師席於

冠席北三少席於冠席南典設郎張帷幄於東序內設

褥席於帷中又張帷幄於序外擬置饌物等內直郎陳服於帷內東領北上衮冕服玄衣纁裳九章白紗中單黼領襟襖裾革金鈎釧大帶朱黻二章玉具劍火珠鏢首瑜玉雙珮珠組雙大綬四綵赤白縹紺純朱質長一丈八尺三百二十首廣九寸

小綬長二尺六寸色同大綬而首半之間施二玉環

白鞵赤舄金飾象笏遠遊冠服絳紗袍白紗中單皐領標襖裾白方心曲領假帶絳紗蔽膝白練裙襦白鞵黑舄其革帶劍珮綬笏與冕服同緇布冠玄衣素鞵白紗

中單青領標襪裾履鞮革帶大帶笏緇纁

用皂羅巾方六寸屬帶於

前兩隅

犀簪二物同箱在服南櫛實於箱又在南莞筵四

紛純纁席四績純又在南良醢令實側罇醢醴加勺罍
於序外帷內設罍在洗北篚在洗南東肆實巾一角觶
角柶各一加罍太官令實饌豆九籩九於罇西俎在豆
北執在庭罍洗者絳公服立於罍洗之南北向執帷內
罇罍洗籩豆俎等並絳公服立於罇罍豆俎之所冕白
珠九旒犀導組纓青纁充耳遠遊三梁冠金附蟬九首

施朱翠黑介幘犀導肆髮纓綈緇布冠青組纓屬於冠
冠冕各一箱盛奉禮郎二人各執立於階之西東面北
上主人各贊冠者庶子為之升諸東序帷內少北戶東西面
立典謁引羣官以次入就常位初賓贊入次左庶子版
奏外辦通事舍人引三師等入就閣外道西位東面立
皇太子著空頂黑介幘雙童髻玉導寶飾綵衣

紫褶綠袴織成

標領綠錦紳烏皮履

乘輿以出洗馬迎於閣門外左庶子跪奏稱

左庶子臣某言請殿下降輿俛伏興還侍位皇太子降

輿洗馬引之道東位西向立左庶子又前跪奏稱左庶子臣某言請殿下再拜皇太子再拜三師三少答再拜洗馬引就階東南位三師訓導在前三少訓從於後千牛仗二人夾左右其餘仗衛列於師保之外通事舍人引宗正卿入見皇太子訖通事舍人引出迎賓洗馬引皇太子初行樂作至階東西面立偃麾樂止

凡樂皆伶官帥舉麾

工鼓柷而後作偃麾戛敔而後止

宗正卿引迎賓於門東西面賓立於

門西東面宗正卿再拜賓不答拜賓入門樂作主人從

入立於樂懸東北西面賓入贊冠者從入舍人引賓贊詣殿階間南立樂止贊冠者立於賓西南東面節在賓東少南西面制案在贊冠西南東面賓就案取制執洗馬引皇太子詣受制位北面立皇太子初行樂作至位樂止主節脫節衣賓稱有制皇太子再拜宣詔曰制皇太子某吉日元服率由舊章命太尉就宮展禮訖皇太子又再拜少傅進詣賓前受制書退授皇太子皇太子受制書付庶子案退洗馬引皇太子師保等如式升東

階量人從升初行樂作至階樂止入東序帷內近北西向立

師保等就席位訖賓升西階宗正卿升東階各立席後
初賓升舍人引贊冠者詣盥洗盥手升自東階詣序帷
內於主人贊冠之南俱西面贊引皇太子出立於席東
西面賓之贊冠者取纓櫛二箱坐奠於皇太子南端興
席北少東西向立賓揖皇太子進升筵西向坐賓之贊
冠者進筵前東面坐脫空黑介幘置於箱櫛畢設纓興
少北南面立賓降盥主人從降樂作賓升樂止主人從

升執緇布冠者升賓降一等受之右執頂左執前進皇太子筵前東向立祝曰令月吉日始加元服棄厥幼志順其成德壽考維祺以介景福乃跪冠興復位東面立賓之贊冠進筵前東面跪結纓興復位皇太子興賓揖皇太子贊冠者引皇太子適東序帷內著玄衣素裳之服以出立於席東西面賓揖皇太子進升筵西向坐賓之贊冠者進筵前東面跪脫緇布冠置於黑介幘之箱櫛纚依舊不解興復位賓降二等受遠遊冠右執頂左

執前進皇太子筵前東向祝曰吉月令辰乃申嘉服克敬威儀式昭厥德眉壽萬年永受祺福乃跪冠興復位主人贊冠者引皇太子適東序帷內著朝服以出立於席東西面賓揖皇太子進升筵西向坐賓之贊冠者進筵前東向跪脫遠遊冠置於纚箱櫛纚依舊不解興復位賓降三等受冕右執頂左執前進皇太子筵前東向祝曰以歲之正以月之令咸加其服以成厥德萬壽無疆承天之慶乃跪冠興賓復位賓之贊冠者跪受簪結

纓興復位皇太子興賓揖皇太子贊冠者引皇太子適東序著袞冕之服以出立於席東西面贊冠者徹纓櫛二箱入於帷內主人贊冠者又設醴皇太子席於室戶西南向下莞上藻賓之贊冠者於東序帷內盥手洗解典膳郎酌醴加柶覆之面柄賓之贊冠者受面葉立於序內南面立賓揖皇太子贊冠者引皇太子就筵西南面立賓進受醴加柶面柄進皇太子筵前北面立祝曰甘醴惟厚嘉薦令芳拜受祭之以定厥祥承天之休壽

考不忘皇太子筵西拜受解賓復位東面答拜贊冠者
興進饌陳於皇太子筵前皇太子升筵坐左執觶右執
脯孺於醢祭於籩豆之間贊冠者取篚殖徧孺於豆以
授皇太子又祭於籩豆之間贊冠者取肺一以授皇太
子皇太子奠觶於薦西興受肺却左手執本坐繚右手
執末以祭上左手齊之興以授贊冠者加於俎皇太子
悅手興取觶以栖祭醴三始扱一祭又扱再祭加栖於
觶面葉興筵末坐啐醴建栖興降筵西南南面坐奠觶

再拜執觶興賓答拜皇太子升筵坐奠觶於薦東興降
筵贊冠者引皇太子降自西階立於西階之東南面賓
初答拜訖降立於西階之西近南東面引賓之贊冠者
隨降立於賓西南東面皇太子立定賓少進字之曰禮
儀既備令月吉日昭告厥字君子攸宜宜之於嘏永受
保之奉勅字某皇太子再拜曰某雖不敏敢不祇奉又
再拜洗馬引皇太子降初行樂作至阼階下位樂止三
師在南北面三少在北南面立定皇太子西面再拜三

師等答再拜以出於三師拜訖典儀曰再拜贊者承傳
羣官在位者皆再拜左庶子前稱禮畢皇太子乘輿以
入侍臣從至閣如常儀初皇太子降通事舍人引賓贊
及宗正出就會所

會賓贊

賓既出於會所門外之西東面北上宗正卿立於門東
西面立定一揖一讓而入宗正卿立於座東西面賓贊
立於座西東面俱再拜就座俛伏坐遂行酒酒至賓主

俱興再拜就席坐飲食至賓主俱興設食訖賓主俱坐
食會訖贊立於西廂東面南上宗正卿立於東廂西面
執事奉束帛之篚以授宗正卿又執事者奉束帛篚立
於宗正卿之後後牽乘馬入陳於庭北首西上賓贊俱
迴北面西上再拜宗正卿以幣篚進西南向授賓執事
者以幣進授贊冠者宗正卿與執事者退復位賓贊降
從者互受幣賓當庭實揖左右馬以出三馬從出從者
互受馬宗正卿出門東西面賓出門西東面北上宗正

卿與賓俱揖而退賓贊就車輅詣順天門外復命

朝謁

朝前衛尉先於順天門外東朝堂之北設太子次又於後設三師三少及詹事等次皇太子冠訖諸衛尉率依常行鹵簿陳列威儀仗衛前後部鼓吹備列師傅以下宮臣皆服其服皇太子服遠遊冠絳紗袍乘輿以出儀衛侍從如常禮洗馬前導皇太子出重明門左庶子跪奏請降輿升輅又左庶子稱令曰諾左庶子俛伏興皇

太子降輿升金輅三師乘輅車訓導在前三少亦乘輅車訓從在後威儀仗衛依鹵簿發引鳴鐃而行至長樂門鐃吹止至順天門次迴輅西向左庶子跪奏請降輅就次又左庶子稱令曰諾左庶子俛伏興皇太子降輅洗馬前導入次左庶子侍右舍人引三師三少詹事就次皇太子停於次少頃舍人奏聞典儀先於皇帝所御殿前設皇太子位左庶子跪奏請入又左庶子稱令曰諾左庶子俛伏興皇太子出次左庶子等夾侍舍人引

洗馬導引當門揖引入外宮諸儀衛鹵簿等悉陳列於門外皇太子自東上閣洗馬左庶子等從入至皇帝所御殿前位北向立從官陪後左庶子贊拜皇太子再拜侍中宣勅戒曰事親以孝接下以仁使人以義養人以惠訖皇太子再拜少進稱臣雖不敏敢不祇奉又再拜訖引下詣皇后所御殿至殿院內給事奏聞出則皇太子入洗馬左庶子等不入太子至皇后所御殿前北向立再拜尚儀前承令降詣皇太子西北東面稱令曰皇

太子再拜宣令戒之詞如皇帝皇太子再拜少進稱臣
夙夜祇奉不敢失墜又再拜司言引至閤舍人承引以
出皇太子還如來儀

皇太子謁太廟

前一日皇太子宿齋於正殿其宮臣從入廟者宿齋於
家正寢所司掃除廟之內外衛尉設皇太子次於正寢
西南角東向又設三師以下及宮官次於皇太子之後
少近西俱東向又設宮官次於東宮朝堂奉禮郎設皇

太子版位於朝堂道東北向典儀設宮臣位於重明門
外文官在東西面武官在西東面每等異位重行俱以
北為上其日未明所司依鹵簿陳設於重明門外宮臣
應從者依時刻集朝堂次皆服朝服非朝服者服常服
諸率各勒所部陳設如式左庶子版奏請中嚴僕策輅
於西閤外南向左右執刀立於輅前北向舍人引宮官
各就位侍衛之官各服其罷服其庶子負寶如式俱詣
閤奉迎左庶子版奏外辦僕奮衣而升正立執轡皇太

子服遠遊冠絳紗袍以出左右侍衛如常洗馬引皇太子升僕立授綬命車右升訖車驅左庶子以下夾侍如式出重明門左庶子進當輅前跪奏稱左庶子臣某言請車輅權停請侍臣上馬俛伏興退稱侍臣上馬贊者唱侍臣上馬文武侍臣皆上馬宮官上馬畢左庶子進當輅前跪奏稱左庶子臣某言請發引俛伏興還侍位皇太子車輅動鐃吹不作文官在左武官在右至下馬所侍臣並下車馬皇太子至次所迴輅南向庶子跪奏

稱左庶子臣某言請殿下降輅俛伏興還侍位皇太子
降輅洗馬引入次侍臣立如常皇太子入次一刻頃左
庶子跪奏稱左庶子臣某言請殿下出次俛伏興皇太
子出次謁者引家令引皇太子入自南門三師三
少導從如式庶子二人一人贊左一人贊右舍人二人
從近仗量人從入皇太子至位立定家令奏請殿下再
拜皇太子再拜少頃家令奏禮畢謁者引家令家令引
皇太子出自南門升輅還宮如來儀至重明門外皇太

子乘輅入將士停三師三少還皇太子至殿前迴輅左
庶子跪奏請殿下降輅俛伏興皇太子降入侍臣從至
閣左庶子跪奏請將士各還本位

其還宮鳴
鑼吹如常

會羣臣

皇太子冠見廟之明日皇帝會羣臣如元會之儀其上
壽詞云皇太子爰以吉辰載加元服德成禮備普天同
慶臣等不勝悅慶謹上千萬歲壽

羣臣上禮

先上禮三日本司宣令諸應上禮文武之官一品以下五品以上前一日衛尉量設次於東朝堂畫漏上水七刻各集於次皆朝服奉禮郎先設上禮之官位於東朝堂南文東武西北面重行相對為首又設中書舍人位於文官為首者之北南向設奉禮郎位於文官東北贊者二人在東南差退俱西向牛酒在文武二位之間少前舍人各引應上禮之官就位定令史二人對舉賀錄案禮部郎中引就中書舍人前取賀錄授舍人訖引案

退奉禮郎唱再拜贊者承傳在位者皆再拜中書舍人奉賀錄入進舍人引在位者退酒十二斛犢十二頭赤繩為籠頭奏訖並付所司

皇太子會宮臣

皇太子會宮臣如常會之儀上壽與上同詞

宮臣上禮

先上禮一日詹事宣告上禮之官詹事以下七品以上晝漏上水七刻皆朝服集東宮南門之左典儀先設羣

官位於中門外北面以西為上牛酒置其位西五步少
近晝漏上水八刻通事舍人引羣官皆就位定詹事丞
奉羣官簡錄案於詹事前東面跪授導客舍人導客舍
人西面立受迴南向立典儀唱再拜詹事以下俛伏興
皆再拜導客舍人以簡錄案入通事舍人引羣官詹事
以下退酒九斛盛以銅鍾一斛犢九頭赤繩為籠頭皆
付所司

通典卷一百二十六

欽定四庫全書薈要卷九千二百四十五

史部

通典卷一百二十七

唐 京兆 杜佑 君卿 纂

禮八十七 開元禮纂類二十二 嘉六

皇太子納妃

臨軒命使

將行納采制命使者吏部承以戒之前一日尚舍奉御設御幄於太極殿北壁下南向衛尉設羣官次於東西

朝堂太樂令展宮懸並如常儀其日典儀設文官一品以下五品以上位於橫街之北西面北上朝集使五品以上合班六品以下位於橫街南朝集使六品以下合班蕃客又於其南皆西面北上設武官一品以下五品以上位於橫街北東面北上朝集使五品以上合班諸親位於其南六品以下位於橫街南朝集使六品以下蕃客等又在南皆東面北上設典儀位於懸之東北贊者一人在南少退俱西向設舉麾位於殿上西階之西

東面設使者受命位於橫街南道東北面西上奉禮設門外位文官一品以下五品以上位於順天門外道東每等異位重行西面武官五品以上位於道西每等異位俱重行東面以北為上未明二刻諸衛勒所部屯門布黃麾半仗入陳於殿庭如常儀羣官依時刻集朝堂俱就次各服朝服侍中量時刻版奏請中嚴鈸戟近仗就陳於閣外太樂令以下帥工人入就位諸侍衛之官各服其罷服侍中中書令以下諸侍臣俱詣閣奉迎典

儀帥贊者先入就位吏部兵部各贊羣官出次典謁各引就門外位侍中版奏外辦皇帝服袞冕出坐如常儀通事舍人引羣官以次入就位立定典儀曰再拜贊者承傳羣官在位者皆再拜吏部與禮部侍郎贊使主副出典謁引就受命侍中前承制降詣使者西北東面稱有制使主副俱再拜侍中還侍位典謁引使主副出初使者將出典儀曰再拜贊者承傳羣官在位者皆再拜通事舍人引羣官出侍中前跪奏稱侍中臣某言禮

畢俛伏興還侍位皇帝降座入自東房侍衛警蹕如來
儀侍臣從至閤使主副乘輅備儀仗而行從者乘車以
從

納采

前一日主人設使者次於大門之外道右南向其日大
昕使者公服至於妃氏大門外掌次者延入次

凡賓主
及行事

者皆
公服

主人受其禮於廟

無廟者受
於正寢

掌事者布神席於室

戶外之西莞筵紛純加藻席畫純南向右雕几使者出

次謁者引立於大門外之西東面主人立於大門內西面
賓者立於主人之左北面受命出立於門東西面曰
敢請事使者曰奉制作儷儲宮允歸令德率由舊章使
某納采賓者入告主人曰臣某之女不教若而人既蒙
制訪臣某不敢辭賓者出告掌畜者以鴈授使副使副
進授使者退復位使者左手執之賓者引主人迎於大
門之南北面再拜使者不答拜謁者引使者入門而左
主人入門而右使者升自西階立於楹間俱南面西上

主人升自東階進使者前北面使者曰某奉制納采主人降詣階間北面再拜稽首升進北面受鴈退立於東階上西面使者降自西階以出

問名

使者既出立於門外之西東面初使者降左右受鴈於序端主人降立於內門東廂西面儗者進受命出請事使者曰某將加卜筮奉制問名儗者入告主人曰制以某之子備數於儲宮臣某不敢辭儗者出告掌畜者以

鴈授使副主人拜迎入俱升堂南面如納采儀使者曰
某奉制問名將加諸卜筮主人降詣階間北面再拜稽
首升進北面受鴈少退仍北面曰臣某第某女某氏出
使者降自西階出立於內門外之西東面初使者降主
人退於阼階東左右受鴈於序端主人降立於內門東
廂西面儗者進受命出請事使者曰禮畢儗者入告主
人曰某公為事故至於某之室某有先人之禮請禮從

者

其儀與納
后禮賓同

納吉

前一日主人設使者次如常其日大昕使者至妃氏大門以下儐者出請事如納采儀使者曰加諸卜筮占曰協從制使某也納吉儐者入告主人曰臣某之女弗教惟恐不堪龜筮云吉臣某謹奉典制儐者出告掌畜者以鴈授使副主人迎拜入俱升堂南面並如納采儀主人降詣階間北面再拜稽首升進北面受鴈使者降自西階立於大門外之西東面初使者降主人還阼階東

左右受鴈於序端主人降立於內門西面儼者進受命出請事使者曰禮畢其實使者皆如問名之儀

納徵

前一日主人設使者次如常儀其日大昕使者至妃氏大門外掌次者延入次執事者設布幕於內門之外玄纁束帛陳於幕上乘馬陳於幕南北首西上執事者奉穀珪以匱俟於幕東西面主人掌事者設几筵如常使者出次謁者引立於大門外之西東面主人立於大門

內西面儼者進受命出請事使者曰制使某以玉帛乘馬納徵儼者入告主人曰奉制賜臣以重禮臣某祇奉典制儼者出告又儼者引主人迎於大門外之南北面再拜使者不答拜謁者引使者入門而左主人入門而右至於內門外使者立於門西東面北上主人立於門東西面執事者坐啓匱取珪加玄纁上興以授使副使副進授使者退復位使者受玉帛謁者引使者入門而左主人入門而右牽乘馬者從入三分庭一在南首西

上使者升自西階立於楹間俱南面西上主人升自東階進使者前北面使者曰某奉制納徵主人降階間北面再拜稽首升進北面受玉帛使者降自西階出立於內門外之西東面初使者降主人還阼階東左右受玉帛受馬自左受之以東牽馬者既授馬自前西出僎者進受命出請事使者曰禮畢其實使者如納吉之儀

告期

前一日主人設次設几筵及僎者受命請事等並如納

采儀使者曰詢於龜筮某月某日吉制使某告期其授鴈升堂受命之儀一如納采使者曰某奉制告期主人降詣階間北面再拜以下禮畢如納采其實使者如納徵儀

告廟

有司以特牲告如常禮祝文臨時撰

冊妃

前一日主人設使者次如常設宮人次於使者西南俱

東面障以行幃其日奉禮設使者位於大門外之西東向使副及內侍位於使者之南舉冊案及璽綬命服者在南差退俱東向設主人位於門南北面設使者以下及主人位於內門外儀皆如之設典內位於內門外主人南西面設宮人位於門外於使者之後俱重行東向以北為上障以行幃設贊者二人位於東階東南西向典內先置一案於閣外近限使主副朝服乘輅持節備儀仗鼓吹備而不作至妃氏大門外使者降輅掌次者

延入次宮人等各之次掌嚴奉褕翟衣及首飾內廐尉
進厭翟車於大門之外道西東向以北為上諸衛率其
屬布妃儀仗如常使者出次典謁引使者以下持節者
前導及宮人典內各就位持節者立於使者之北少退
俱東向主人朝服出迎於大門外之東西面立定少頃
南北面再拜使者不答拜典謁引使者持節者前導入
門而左持案以下從之主人入門而右至內門外各就
位立定奉冊寶案者進當使副前使副受冊寶奉案者

退復位使副以冊寶進授使者退復位內侍進使者前
西面受冊寶東面授典內退復位典內持冊寶入立於
閣外之西東面跪置冊寶於案典內俛伏興奉衣服及
侍衛者從入皆立於典內之南俱東面北上傳姆贊妃
出引立於庭中北面掌書進跪取玉寶興進立於妃前
南向掌嚴奉首飾及綸翟與諸宮侍衛者次入侍衛如
常典內還復位司則前贊妃再拜還侍位妃再拜司則
進掌書前北面受冊寶進妃前南向授妃妃受以授司

閨司則又前贊妃再拜還侍位妃又再拜訖司則前請妃升座還侍位司閨引妃升座南向坐宮官以下俱降立於庭重行北向以西為上立定贊唱者曰再拜宮官以下皆再拜訖諸應侍衛者各升立於侍位司則前啓禮畢妃降座司閨引妃入室主人賓使者如禮賓之儀使者乘輅而還

臨軒醮戒

前二日本司宣攝內外各供其職前一日衛尉設次於

東朝堂之北西向又設宮官次於重明門外如常儀其

日前三刻宮官俱集於次各之次皆服其服諸衛各勒

所部依圖陳設左庶子奏請中嚴內僕進金輅於閣外

南向率一人執刀立於輅前北向前二刻諸衛之官各

服其器服以次詣閣奉迎

左庶子負壘如式

宮官應從者各出

次立於門外文東武西重行相向北上左庶子奏外辦
太僕奮衣而升執轡皇太子著袞冕之服以出左右侍
衛如常儀皇太子乃升僕立授綏車驅左庶子以下夾

侍如常出門車權停令車右升輅陪乘宮臣上馬訖皇太子車動鼓吹振作如式文武官皆乘馬如常至承天門下車所迴輅南向左庶子進當輅跪奏稱左庶子臣某言請降輅俛伏興還侍位皇太子降輅典謁引舍人舍人引皇太子就位侍衛如常儀前一日尚舍奉御整設御座於太極殿阼階上西向衛尉設羣官次於朝堂太樂令展宮懸於殿庭乘黃令陳車輅並如常儀其日尚舍直長鋪皇太子席位於牖間南向

其席位莞筵紛純加藻席纁純

尚食奉御設酒罇於東序下有坵加勺設冪實爵一又
陳籩脯一豆醢一在罇西脯前三刻典儀設羣官版位
於內奉禮設版位於外如朝禮諸衛勒所部屯門布仗
立仗入陳於殿庭羣官依時刻集朝堂俱就次各服其
服侍中版奏請中嚴鈸戟近仗就陳於閣外太樂令帥
工人入就位脯前二刻諸衛侍之官各服其器服侍中
中書令以下俱詣閣奉迎典儀帥贊者先入就位吏部
兵部贊羣官俱出次通事舍人各引就門外位侍中版

奏外辦皇帝服通天冠絳紗袍乘輿以出曲直華蓋警蹕侍衛如常儀皇帝將出仗動皇帝出自西房即御座西向坐符寶郎奉寶置於御座如常通事舍人引羣官以次入就位羣官立定典儀曰再拜贊者承傳羣官在位者皆再拜初羣官入訖典謁引舍人舍人引皇太子

侍從如常式皇太子每行事左庶子執儀贊相

至懸南北面立典儀曰再拜贊

者承傳皇太子再拜典儀引舍人舍人引皇太子詣西階皇太子脫烏舍人引升就席西南面立尚食奉御酌

酒於序進詣皇太子西南東面立皇太子再拜受爵尚
食直長又薦脯醢於席前皇太子升薦座左執爵右取
脯搗於醢祭於籩豆之間右祭酒興降席西南面坐啐
酒奠爵再拜執爵興奉御受虛爵直長徹薦還於房舍
人引皇太子進當御座東面立皇帝命之曰徃迎爾相
承我宗事勗帥以敬皇太子曰臣謹奉制旨遂再拜舍
人引皇太子降自西階納舄訖典謁引舍人舍人引皇
太子出門典儀曰再拜贊者承傳羣官在位者皆再拜

通事舍人引羣官以次出侍中前跪奏稱侍中臣某言
禮畢俛伏興還侍位皇帝降座入自東房警蹕侍衛如
來儀侍臣從至閣

親迎

前一日衛尉設皇太子次於妃氏大門之外道西南向
設侍衛羣官次於皇太子次西南東向北上皇太子既
受命遂適妃第執燭馬前鼓吹振作如式侍從如常皇
太子車至妃氏大門外次前迴輅南向左庶子進當輅

前跪奏稱左庶子臣某言請降輅俛伏興還侍位皇太子降輅之次車將至主人設几筵如常醴女如別儀妃服褕翟花釵立於東房侍從如常主婦衣禮衣鈿釵立於房戶外之西南向主人公服出立於大門之內西向

在廟則主人以下著祭服

儼者公服立於主人之左北向左庶子前

跪奏稱左庶子臣某言請就位俛伏興還侍位皇太子出次立於門西東面侍衛警蹕如常儼者進受命出門東西面曰敢請事左庶子承傳進跪奏如常皇太子曰

以茲初昏某奉制承命左庶子俛伏興傳於儼者入告
主人曰某謹敬具以須儼者出傳於左庶子奏如初儼
者引主人迎於門外之東西面再拜左庶子前跪奏稱
左庶子臣某言請答拜俛伏興還侍位皇太子答再拜
主人揖皇太子先入掌畜者以鴈授左庶子進東南向
奉授皇太子既執鴈進入侍衛者量入侍從及內門主
人讓曰請皇太子入皇太子曰某弗敢先主人又曰固
請皇太子入皇太子曰某固不敢先主人揖入皇太子

從入皇太子入門而左主人入門而右及內門主人揖
入內雷將曲揖當階揖皇太子皆報揖至於階主人曰
請皇太子升皇太子曰某敢辭主人曰固請皇太子升
皇太子曰某固敢辭主人又曰終請皇太子升皇太子
又曰某敢終辭主人揖皇太子報揖主人升立於阼階
上西面皇太子升進當房戶前北面跪奠鴈俛伏興再
拜降出主人不降送內廐尉進厭翟於內門外傳姆導
妃司則前引出於姆左傳姆在右保姆在左

執燭及侍
從如式

父少進西面戒之必有正焉若衣若笄命之曰戒之敬之夙夜毋違命母戒之西階上施衿結帨命之曰勉之敬之夙夜毋違庶母及門內施鞶申之以父母之命命之曰恭敬聽宗爾父母之言夙夜無愆視諸衿鞶妃既出內門至輅後皇太子授綏母辭不受曰未教不足與為禮妃升輅乘以几姆加幃皇太子馭輪三周馭者代之皇太子出大門乘輅還宮侍衛如來儀妃仗次於後主人使其屬送妃以儻從

同牢

其日司閨設妃次於東閣內道東南向掌筵鋪褥席將
夕司閨設皇太子幄於殿室西廂東向鋪地重茵施屏
障設同牢之席於室內皇太子之席西廂東向妃東廂
西向

席皆莞筵紛純
加藻席績純

席間量容牢饌典膳監設洗於阼

階東南東面當東雷南北以堂深壘水在洗東篚在洗
西南肆

篚實以二
巾二爵

設妃洗在東房筵北壘水在洗西篚

在洗東北肆皆加勺巾罍典膳監先饌於房西牖下籩

豆各二十簋簋各二鉶各三瓦甒一皆加巾罍蓋俎三

罇在室內北牖下玄酒在西加罍勺南柄

罍夏用紗冬用絛

罇

在房戶外之東無玄酒篚在南實四爵合盞

其器皆烏漆惟甒以

陶甒以瓢

皇太子車至侍臣下馬所車權停文武侍臣皆下

馬車右降立於輅右車動車右夾輅而趨車至左閣迴

輅南向左庶子進當輅前跪奏稱左庶子臣某言請降

輅俛伏興還侍位皇太子降輅入俟於內殿門外之東

西面侍衛如常儀左庶子以下皆退妃至宮門鹵簿仗

衛停於門外近侍者從如常入至左閣外迴輅南向司
則進當輅前啟請妃降輅掌筵依式執扇前後執燭如
常儀妃降輅就次整飾司閨引妃詣內殿門西東面皇
太子揖妃以入又司閨前升自西階妃後升執扇燭者
陳於東西階內皇太子即席東向立妃即席西向立司
饌進詣階間北面跪奏稱司饌妾姓言請具牢饌興司
則承令曰諾司饌率其屬升奉饌入設於皇太子及妃
座前醬在席前菹醢在其北俎三入陳於豆東承俎特

在北

豆在菹醢之東

司饌設黍於醬東稷在東設酒於醬南

饌在

西也設對醬於東

對醬婦醬也設之當特俎

菹醢在其南北上設黍於

豕俎北其西稷稻粱設酒於醬北司饌啟會郊於簠簋

之南對簠簋於北

啟發也豆蓋徹於房內

各加匕箸設訖司饌北

面跪奏饌具興皇太子及妃俱坐司饌跪取脯擣於醢

取菲菹擣醢授皇太子又司饌取脯擣於醢取菲菹擣

醢授妃皇太子及妃俱受祭於籩豆之間司饌興取黍

實於左手徧取稷反於右手授皇太子又司饌取黍實

於左手徧取稷反於右手授妃皇太子及妃各受祭於
菹醢之間司饌俱興各立取肺皆絕末跪授皇太子及
妃俱受又祭於菹醢之間司饌俱以肺加於俎掌嚴授
皇太子巾又掌嚴授妃巾皇太子及妃皆悅手以柶極
上鉶徧擣之祭於籩豆之間司饌品嘗皇太子饌又司
饌品嘗妃饌司饌各移黍置於席上以次跪授肺脊皇
太子及妃皆食以涪醬三飯卒食司饌北面跪奏稱司
饌妾姓言請進酒司則承令曰依奏興司饌北面俱盥

手洗爵於房入室詣酒樽所酌酒進北面立皇太子及妃俱再拜興一人進授爵皇太子一人以爵授妃皇太子及妃俱受爵司饌俱退北面答再拜皇太子及妃俱坐皇太子及妃俱祭酒司饌各以肝從司則俱進受虛爵奠於篚司饌又俱洗爵酌酒再醕皇太子及妃俱受爵俱飲司則進受虛爵奠於篚三醕用卷如禮再拜皇太子及妃立於席後司則降東階洗爵升酌於戶外樽進北面俱奠爵興再拜皇太子及妃俱答拜司則俱坐

取爵祭酒遂飲卒爵奠爵遂拜執爵興降奠爵於篚還侍位司饌北面奏稱司饌妾姓言牢饌畢司則承令曰諾司饌徹饌設於房司則前跪奏稱司則妾姓言請殿下入俛伏興還侍位皇太子入於東房釋冕服著袴褶司則啟妃入幃幄皇太子及妃俱入室媵餽皇太子之饌御餽妃之饌

妃朝見

其日晝漏上水一刻所司列御座於所御殿阼階上西

面

其席莞筵紛純加藻席畫純次席黼純左右玉几

司設設皇后座於室戶外

之西近北南向尚食帥司膳設酒罇於房內東壁下有

坩加勺罇

罇用瓦甒實以醴酒

籩一豆一實以脯醢設於罇北又

設洗於東房近北罍水在洗西篚在東北肆

篚實以巾罍解一角

一其日夙興妃沐浴司則啟請妃內嚴質明諸衛帥其

屬陳布儀仗如常儀近仗入陳於寢門外內廐尉進厭

翟於正寢西階之前南向司則啟外辦妃服褕翟加首

飾以出降自西階升輅侍衛如常至降車所司則贊妃

降輅司言引妃入仗衛停於閣外障扇侍從如常妃至
寢門之外立於西廂東面諸衛勒所部屯門布仗近仗
入陳於所御殿閣外如常侍中奏請皇后內嚴妃既至
寢門侍中版奏外辦皇帝服通天冠絳紗袍以出升自
阼階即御座西向坐侍衛如常儀尚儀又奏皇后外辦
皇后褱衣首飾司言引尚宮尚宮引皇后出即御座南
向坐侍從如常妃奉筭棗栗司饌又執奉筭服脩以從
司則引妃入立於庭北再拜司賓引妃升自西階進東

面跪奠筭於御座前皇帝撫之尚食進徹以東司言引
妃自西階降復北面位奉筭服脩再拜司言引妃升進
北面跪奠筭於皇后座前皇后撫之尚食進徹以東司
言引妃退立於西序東面又再拜司設設妃席於戶牖
之間近北面南向司言引妃立於席西南向尚食又入
東房盥手洗觶酌醴齊加柶面柄出進詣妃席前北向
立妃進東面再拜受醴尚食薦脯醢於席妃升席坐左
手執觶右取脯孺於醢祭於籩豆之間以柶祭醴三始

極一祭又極再祭降席進東面跪取解興即席坐奠解
於薦東興降席司賓引妃降自西階出閤乘車還宮障
扇侍從如來儀

會羣臣

皇帝會羣臣於太極殿如正至之儀唯上壽辭云皇太
子嘉聘禮成克崇景福臣某等不勝慶忭謹上千秋萬
歲壽

通典卷一百二十七

欽定四庫全書薈要卷九千二百四十六

史部

通典卷一百二十八

唐 京兆杜佑君卿纂

禮八十八 開元禮纂類二十三 嘉七

皇太子元正冬至受羣臣賀

并會

前二日本司宣攝內外各供其職前一日典設郎設皇
太子幄座於正殿東序西向守宮設羣官等次東宮朝
堂伶官帥展軒懸之樂於殿庭以姑洗之均又設三罇

鐘姑洗夷則大呂各依其位設登歌以南呂之均及設
麾於殿上並如常儀典設郎鋪羣官牀座於殿上文官
三品以上於皇太子西南重行北向武官三品以上於
皇太子西北重行南向俱以東為上朝集使三品以上
及都督刺史各依方於文武官之下設不升殿者座席
於殿庭東西廂文官四品五品於懸東六品以下於橫
街之南每等異位重行西向北上武官四品五品於懸
西六品以下於橫街之南當文官每等異位俱重行東

向北上朝集使非升殿者分方各依文武官當品之下
諸州使人分方各於朝集使之下亦如之諸親於四品
五品之下

宗親在東異姓親在西掌儀仍各設版位

奉禮設門外位於東宮

朝堂之前文官在東武官在西俱每等異位重行相向

北上諸親位於文武四品五品之下

宗親在東異姓親在西

設諸

州朝集使位東方南方於宗親之南每等異位重行西
面西方北方於異姓親之南每等異位重行東面俱以
北為上典膳量設罇於廊下近北設不升殿者酒罇各

於其座之南皆有坳幕俱障以帷其日質明諸衛率各
勒所部屯門列仗文武羣官依時刻集朝堂次各公服
左庶子量時刻版奏請中嚴近仗就陳於閣外諸侍衛
之官各服其器服俱詣閣奉迎伶官帥帥工人二舞入
就位又伶官帥一人升就位舉麾掌儀帥贊者入就位
吏部兵部贊羣官俱出次通事舍人各引就門外位又
舍人引羣官非升殿者先入就位左庶子版奏外辦皇
太子著從省服

未冠則
雙童髻

以出侍衛如常伶官帥舉麾奏

承和之樂皇太子即座西向坐偃麾樂止

凡樂皆伶官帥舉麾工鼓

祝而後作偃麾
戛鼓而後止

掌儀一人升就西階上東面立贊者二

人立於階下通事舍人引羣官以次入就位公初入門

舒和之樂作左庶子前跪奏稱左庶子臣某言請殿下

迎公王興俛伏興還侍位皇太子降立於座後

若有三公諸伯

叔則降立於東階下西面公至階則升立詣於座後皇太子升降伶官舉麾樂作止如式

公至階樂

止公以下升座者俱脫履於階下

所司先設脫履席

通事舍人

接引羣官升就位立定掌儀唱再拜贊者承傳羣官上

下皆再拜訖通事舍人引羣官為首者一人進皇太子

前東面立賀稱元正首祚景福惟新伏惟皇太子殿下

與時同休

冬至賀云天正長至
伏惟殿下與時同休

賀訖退復位皇太子答

再拜左庶子前承令進宣令訖羣官上下又再拜左庶

子前跪奏稱左庶子臣某言請坐俛伏興還侍位皇太

子坐掌儀唱就座贊者承傳羣官上下就座皆就座俛

伏坐伶官帥引歌者及琴瑟至階脫履於下升就位坐

其笙管者詣階間北面立典膳郎進酒至階掌儀唱酒

至興贊者承傳羣官上下皆俛伏興立席後左庶子到階省酒典膳郎奉酒進皇太子舉酒食官令又行羣官酒酒至掌儀唱再拜贊者承傳羣官上下皆再拜

若皇太子

遣停拜即止

羣官皆搢笏受觶掌儀唱就座贊者承傳羣官

上下皆就座俛伏興飲皇太子初舉酒登歌作昭和之曲典膳郎進受虛觶復於坵登歌訖降復位觴行三周典膳郎進食食升階左庶子到階省案掌儀唱食至興贊者承傳羣官上下俛伏興立座後典膳郎品嘗食訖

以次進置皇太子前食官令又行羣官案

皇太子若不食及宮臣案

先下訖不須興

設食訖掌儀唱就座贊者承傳羣官上下皆就

座俛伏坐皇太子及飯奏休和之樂羣官上下俱飯皇太子食畢樂止仍行酒遂設庶羞伶官帥引二舞以次入酒行九徧會畢掌儀唱可起贊者承傳羣官上下皆俛伏起立席後左庶子前跪奏稱左庶子臣某言請殿下降座俛伏興還侍位皇太子降立於座後掌儀唱再拜贊者承傳羣官上下皆再拜皇太子答再拜通事舍

人引羣官降納履以出公初出樂作

若有三公諸伯叔皇太子升降伶官

帥舉麾作止如式

公出門樂止左庶子前跪奏稱左庶子臣某

言請殿下升座俛伏興還侍位樂作皇太子升座坐樂

止羣官出畢

非升座者仍立於殿庭

左庶子前跪奏稱左庶子臣

某言禮畢俛伏興還侍位皇太子興樂作皇太子降座

以入侍衛如來儀侍臣從至閣樂止又通事舍人引侍

殿庭者以次出皇太子若服袴褶羣官及宮臣皆袴褶

朝集使公服

升座者脫履如式

若設四部樂則去樂懸無警蹕

伶官師帥四部伎立於左右嘉善門外羣官初坐伶官師引四部伎聲作而入各就座以次作如式

皇太子元正冬至受宮臣朝賀

前二日本司宣攝內外各供其職前一日典設郎設皇太子幄座於正殿東序西向衛尉設宮臣次於重明門外伶官帥展軒懸之樂於殿庭以姑洗之均設麾於殿上西階之西又設為首者解劒席於懸西橫街之南並如常儀設宮臣版位於懸南文東武西俱重行北面相

對為首設典儀位於東階南贊者二人在南差退俱西
向北上設宮臣門外位文官道東武官道西重行相向
以北為上

受朝

其日未明三刻開諸宮殿門諸衛率各勒所部屯門列
仗如常宮臣依時刻集重明門外各服其罷服左庶子
版奏請中嚴近仗就陳於閤外伶官師帥工人入就位
又伶官帥一人升就位諸侍衛之官各服其罷服俱詣

閣奉迎典儀帥贊者先入就位通事舍人引宮臣俱就門外位又舍人引六品以下先入就位左庶子版奏外辦皇太子服遠遊冠絳紗袍以出左右侍衛如常儀皇太子將出仗動伶官師跪俛伏興舉麾鼓祝奏永和之樂皇太子升自阼階即座西向坐偃麾戛敔樂止通事舍人引宮官五品以上以次入就位宮臣初入門奏舒和之樂主位樂止宮臣立定典儀曰再拜贊者承傳宮臣在位者皆再拜訖通事舍人引為首者一人詣西階

為首者初行樂作至解劔席後樂止為首者就席解劔
置於席俛伏興通事舍人引升階進當皇太子座前東
面跪賀

其賀詞與羣官同

俛伏興通事舍人引降詣席後為首

者跪著劔俛伏興樂作復懸南位樂止宮臣俱再拜左
庶子前承令降詣宮臣西北東面稱令旨宮臣俱再拜
宣令訖宮臣又再拜左庶子還侍位典儀曰再拜贊者
承傳宮臣在位者皆再拜通事舍人以次引出還次為
首者初行樂作出門樂止左庶子前跪奏稱左庶子臣

某言禮畢俛伏興還侍位皇太子興樂作降座入侍衛
如來儀侍臣從至閣樂止

會

伶官師登歌於殿上以南呂之均典設郎鋪宮臣座席
於殿上文官於皇太子幄座西南重行北向武官於皇
太子西北重行南向俱以東為上設不升殿者座席於
東西廊下設解劔席於懸西橫街之南俱以北為上典
設郎設壽罇於殿上西序之端東西有坵加爵一於罇

下又設升殿者酒罇於西廊下近北設殿下者酒罇各
於其座之南皆有坫幕俱障以帷設訖通事舍人引宮
臣出次俱就門外位左庶子奏外辦皇太子服遠遊冠
絳紗袍以出侍衛如常皇太子將出仗動樂作皇太子
升自阼階即座西向坐樂止典儀一人升就東階上西
面立通事舍人引文武宮臣以次入就位宮臣初入門
樂作為首者至位樂止宮臣立定

若朝會別日設
會贊拜如朝禮

左庶

子前承令降命宮臣升座位者皆再拜通事舍人引應

升殿者詣西階為首者初行樂作至解劔席樂止宮臣各脫烏履跪解劔置於席上俛伏興通事舍人引升階宮臣為首者一人升立於階西東向以下各就座後立於其位又通事舍人引廊下位者就座後上下立定典膳郎前跪稱典膳郎臣某言請賜宮臣上壽俛伏興左庶子稱令曰諾典膳郎退升詣酒罇東面立通事舍人引為首者詣酒罇之所北面立典膳郎酌酒一爵授為首者搢笏受爵通事舍人引為首者詣皇太子座前東

面授左庶子左庶子受爵進置皇太子前為首者執笏
通事舍人引為首者退東面跪稱某宮臣等稽首言正
元首祚冬至云天
正長至臣等不勝大慶謹上千萬歲壽俛伏

興再拜宮臣等上下皆再拜立於席後左庶子前承令
少退宣令訖宮臣上下又再拜左庶子取爵奉進皇太
子舉酒奏休和之樂宮臣上下皆舞蹈三稱萬歲皇太
子舉酒訖左庶子進受虛爵以授典膳郎典膳郎受爵
復於坵樂止初左庶子受虛爵殿上典儀唱再拜階下

贊者承傳宮臣上下皆再拜通事舍人引為首者就座
後立殿上典儀唱就座階下贊者承傳宮臣上下俱就
座俛伏坐伶官帥引歌者及琴瑟至階脫履於下升就
位坐又引笙管進詣階間北面立典膳郎進酒至階殿
上典儀唱酒至興階下贊者承傳宮臣上下皆俛伏起
立席後左庶子到階省酒典膳郎奉酒進皇太子舉酒
食官令又行宮臣酒酒至殿上典儀唱再拜階下贊者
承傳宮臣上下皆再拜俛伏興坐飲皇太子初舉酒登

歌作昭和之樂三終行觴三周典膳郎進食皇太子食
奏休和之樂食畢樂止仍行酒設庶羞之奠如會羣官
儀伶官帥引諸伎以次入樂作若賜酒左庶子前承令
詣東階上西向稱賜酒殿上典儀承傳階下贊者又承
傳宮臣上下皆執笏俛伏起再拜搢笏立受觶就座俛
伏坐飲訖俛伏起授虛觶再拜執笏又再拜就座俛伏
坐酒九行徧會畢殿上典儀唱可起階下贊者承傳宮
臣上下皆俛伏起立席後通事舍人引宮臣降詣解劔

席後跪著劔俛伏興納烏履樂作復懸南位樂止位於東西廊下者仍立於席後立定典儀曰再拜贊者承傳宮臣在位者皆再拜

廊下者拜於席後

諸伎俱作通事舍人引

宮臣以次出為首者初行樂作出門樂止左庶子跪奏稱左庶子臣某言禮畢俛伏興還侍位皇太子興奏永和之樂皇太子降座以入侍衛如來儀侍臣從至閣樂止

皇太子與師傅保相見

前一日衛尉設師傅保次於宮門外道南西向伶官帥
展軒懸於殿庭以姑洗之均其日質明諸衛率各勒所
部屯門列仗典儀設師傅保位於西階之西東向三少
位於師傅保之南少退俱東向北上太師太傅太保及
三少至宮門通事舍人引就次左庶子奏請中嚴伶官
師帥工人就位通事舍人引師傅保及三少立於正殿
門西差退俱東向左庶子奏外辦諸侍衛之官各服其
器服俱詣閣奉迎皇太子著從省服以出左右侍衛如

常儀永和之樂作至東階下西面立樂止通事舍人引
師傅保三少入就位樂作如常師傅保立定皇太子再
拜師傅保答再拜若三少特見則三少先拜通事舍人引師傅保出
樂作止如常師傅保出門左庶子前跪稱左庶子臣某
言禮畢皇太子左右侍衛及樂奏如來儀

皇太子受朝集使參辭

前一日典設郎設皇太子幄座於東宮正殿東序西向
又設宮臣次及朝集使次於重明門外其日質明所司

設宮臣及朝集使次於殿庭諸衛率各勒所部屯門列
仗東宮文武官依時刻集朝堂就位服袴褶朝集使並
就次服公服左庶子量時刻版奏請中嚴近仗就陳於
閣外侍衛之官各服其器服就閣奉迎通事舍人各分
引羣官及朝集使就門外位左庶子版奏外辦皇太子
常服卽座西向坐通事舍人引宮臣入就位如常典儀
曰再拜贊者承傳在位者皆再拜又通事舍人前引朝
集使橫行北面立定掌儀曰再拜朝集使皆再拜通事

舍人承令詣朝集使前稱有令朝集使皆再拜宣令訖
又再拜舍人引宮臣以次出其辭禮亦如之

親王冠

百官一品以下盡九品庶人並附其嫡子但以品第庶子與親王同其降殺則

異

前三日本司帥其屬筮日筮賓於廳事

五品以上嫡子筮於廟門外無

廟筮於正寢之堂主人公服立於楹間之東西面於寢則堂上楹間近東掌事者各服其服立於門西東面於寢則楹間近西東面布筮席於主人之西西面餘並如別儀前三日筮賓如求日之儀主人謂將冠者之父也賓謂可使冠子者
前二日主人至賓第掌次者引之次主人公

服出立於大門外之西東面賓公服立於阼階下西面

賓者公服進於賓之左北面受命出立於門東西面曰

敢請事主人曰皇子某王

一品以下曰某之子其下倣此

將加冠請某

公教之

相稱各隨官爵

賓者入告賓出立於門左西面再拜主

人答再拜主人曰皇子某王將加冠願某公教之

一品以下

云吾子下倣此

賓曰某不敢恐不能供事

一品以下加

敢辭主

人曰某猶願某公教之賓曰王重有命某敢不從主人

再拜賓答拜主人還賓拜送主人命使者戒贊冠者如

戒賓

一品以下主人戒贊冠者如戒賓亦通使子弟戒之

前一日掌次者設次於

大門外之右南向其日夙興掌事者

一品以下贊者庶子同

設洗

於阼階東南東面當東雷

六品以下當東榮

南北以堂深疊水

在洗東加勺簠簋在洗西南肆

簠實巾一勺一加簠

席於東房內

西牖下

無房者張帷

陳衣於席東領北上袞冕服青衣纁裳

九章

五章在衣山龍華蟲火宗彝四章在裳藻粉米黼黻一品袞冕服同上二品鷩冕服七章三章在衣

華蟲藻火四章在裳宗彝粉米黼黻三品毳冕服五章

三章在衣宗彝藻粉米二章在裳黼黻四品繡冕服三

章一章在衣粉米二章在裳黼黻五品玄冕衣

白紗中

無章裳刺黼一章六品以下爵弁服青衣纁裳

單黼領青標襪裾革帶鉤鞞大帶

青帶純其外上朱下綠紉約用組一品二

品大帶皆純其外上以朱下以綠三品大帶四品五品素帶皆純其垂外以玄內以黃紉約皆用青組六品以

下練帶純其內外以編

朱黼二章山火

三品以上飾以裳色山火二章

約用青組中單青領

四品繡冕山一章五品玄冕無章六品爵韞

劍飾以珠玉

三品以上飾以金玉四品五品飾以

金山玄玉雙珮纁朱雙綬四綵赤黃纁紺純朱質纁文

織長丈八尺二百四十首廣九寸

小雙綬長二尺六寸色同大綬而首半之

間施二玉環一品雙珮山玄玉五品以上水蒼玉雙綬一品綠綬綬四綵紫黃赤綠質長丈八尺二百四十首

廣九寸二品三品紫綬三綵紫黃赤純紫質長丈六尺一百八十首廣八寸皆有小雙綬長二尺六寸色同大

綬而首半之一品施二玉環四品青綬三綵青白紅純青質長丈四尺一百三十首廣七寸五品黑綬二綵青

紺純紺質長丈二尺一百首廣六寸皆有雙綬長二尺六寸色同大綬而首半之六品以下無劍珮綬朱

韞赤舄

五品以上同六品以下白韞赤履庶人黑介幘服絳公服方心革帶紉縹假帶韞履庶子以上

皆同遠遊冠絳紗單衣白紗中單皐領標襪裾白裙襦赤

衫一品以假帶曲領方心絳紗蔽膝白韞黑舄一品以下進賢冠

鈎縹珮雙綬六品以下無劍綬八品以下去中單曲領蔽膝黑履庶人黑介幘服白裙襦青領革帶韞履

布冠服青衣素裳白紗中單青領標裙素鞞

其革帶大帶劍珮綬

與冕服同韞舄與遠遊冠服同三品以上中單革大帶劍珮綬與冕服同韞舄與進賢冠同六品以下中單革

帶繡帶與爵弁同鞮履與進賢冠服同庶人帶鞮履與介幘服同去鞮

緇纁其纁用皂巾方六寸屬於

前兩隅

犀簪櫛實於箱在服南莞筵三紛純加藻席三緇

純在南

三品以上莞筵四加藻席四四品五品蒲筵四緇布純加荏席四立帛純六品以下蒲筵四不

加荏席其庶子各如其品嫡子之席各用三

罇於房戶外之西兩鬴玄酒在

西加勺罍設於罇東置二爵加罍豆十籩十在服北

俎三在籩豆北

凡牲體節折如離肺俎三實羊豕及腊籩實脯棗之類豆實菹醢之屬一品以

下側罇醢醴在服北加勺罍設在罇北實角觶角柶各一加罍饌陳於坫北四品以下無坫同設篚庶子罇於房戶外之西兩鬴玄酒在西加勺罍設於罇東置二爵於坫加罍饌陳於服北一品俎三籩十豆十三品八

四品七五品六六品以下用特牲
俎一簋二豆三庶子同嫡子牲器
設洗於東房近北壘

水在洗西篚在洗東北肆實以巾質明賓贊至於主人

大門外掌次者引之次賓贊俱公服諸行事者各服其

服六品以下無公服者服常服執罇壘篚者皆就位冕青珠九旒青

纁充耳犀簪導組纁色如其綬三品以上袞冕垂青珠九旒以組為纁色如其

綬青纁充耳角簪導鷩冕七旒毳冕五旒餘皆同袞冕

四品五品繡冕垂青珠四旒以組為纁色如其綬青纁

充耳角簪導玄冕三旒餘同繡冕六品以下爵弁玄纁庶人則黑介幘庶子同嫡子遠遊冠三梁

金附蟬黑介幘纁青綏犀導三品以上進賢冠三梁纁青綏犀導四品五品以上

二梁六品以下一
梁庶人則黑介幘緇布冠青組纓冠冕各一箱各一人

執之待於西階之東西北上設主人之席於阼階上西

面設賓席於西階上東面皇子席於房戶之西南面

房外

罇俱下莞上藻

一品以下冠者席於主人東北面庶子如親王儀

主人公服立

於阼階當東序西面親公服非公服者常服立於疊洗

東南西面北上

一品以下偕諸尊者停別室儼者公服立於門內道東北面

皇子雙

童髻空頂幘玉導金寶飾綵袴褶錦紳烏皮履

四品五品導飾

以金六品以下無金飾

立於房內南面主人贊冠者公服立於房

內戶東西面賓及贊冠者出次立於門西贊冠者少退俱東面北上賓者進於主人之左北面受命出立於門

東西面曰敢請事賓曰皇子某王將冠某謹應命

三品以下

云某子有嘉禮

命執事庶子同

賓者入告主人迎賓於大門外之東西

面再拜賓答拜

凡賓主拜揖入出皆贊者相導

主人揖贊冠者贊冠者

報揖主人又揖賓賓報揖主人入賓及贊冠者次入及

內門主人揖賓賓報揖主人與賓入贊冠者從至內雷

將曲揖賓報揖主人及階主人立於階東西面賓立於

階西東面主人曰請公升

一品以下請吾子升他倣此

賓曰某備將

事敢辭主人曰固請公升賓曰某敢固辭主人曰終請

公升賓曰敢終辭主人升自阼階立於席東西面賓升

自西階立於席西東向贊冠者及庭盥於洗升自阼階

入東房立於主人贊冠者之南俱西面主人贊冠者引

皇子出立於戶外之西南面賓之贊冠者取纚櫛簪箱

跪奠於皇子筵東端

一品以下筵南庶子筵東

興席東少北南面立

一品以下席北少東西面立庶子南面

賓揖皇子賓主俱即席坐皇子進

升席南面坐

一品以下西面坐庶子南面

賓之贊冠者進筵前北面

一品以下東面庶子北面

跪脫雙童髻置於櫛箱畢設纚興復位賓

主俱興賓降盥主人從降賓東面辭曰願主不降

一品以下

云吾子下倣此

主人曰公降辱敢不從賓降至盥洗手訖詣

西階賓主一揖一讓升主人立於席後西面賓立於西

階上東面執緇布冠者升賓降一等受之右執頂左執

前詣皇子筵前北面跪冠興復西階上席後東面立

祝文

曰令月吉日始加元服棄爾幼志順爾成德壽考維祺介爾景福乃跪奠冠興

賓之贊冠者進

筵前北面跪設頰結纓興復位

一品以下東向跪結纓庶子同親王而無頰

皇子興賓揖皇子適房賓主俱坐皇子著青衣紫裳之

服出戶西南面立賓主俱興賓揖皇子進立於席後南

面

一品以下進升席西面坐
一品以下庶子同親王

賓降盥主人從降辭對如

初賓盥手跪取爵於篚興洗訖詣西階賓主一揖一讓

升主人立於席後西面賓詣酒樽所酌酒進皇子筵前

北向立祝曰旨酒既清嘉薦亶時始加元服兄弟具來

孝友時格永乃保之皇子筵西拜受爵賓復西階上東

面答拜執饌者薦籩豆於皇子筵前皇子升筵坐左執爵右取脯濡於醢祭於籩豆之間祭酒興筵末坐啐酒

執爵興降筵西跪奠爵再拜執爵興賓答拜冠者升筵跪奠爵於薦東興立筵西執饌者徹薦爵賓揖皇子進

升筵南面坐

一品以下無賓降盥主人從降下至此儀其一品以下嫡子三加冠後酌醴以禮之

又有祝辭其庶子則醺而不醴親王冠同於庶子

賓之贊冠者跪脫緇布冠置

於箱櫛畢設纚興復位賓降二等受遠遊冠

一品以下進賢冠庶

人黑介幘左執頂右執前詣皇子筵前北面跪冠

一品以下詣冠者筵

前東向立祝曰吉月令辰乃申爾服敬爾威儀淑慎爾德眉壽萬年永受斯福乃跪冠

興復位賓

之贊冠者坐設簪結纓興復位皇子興賓揖皇子適房

賓主俱坐皇子著朝服

一品以下庶子著絳紗服庶人則白裙襦服

出房戶

西南面立賓主俱興賓揖皇子進立席後南面賓詣酒

罇所

一品至三品嫡子冠禮無賓詣酒罇所以下執饌者徹薦爵立俟

取爵酌酒進皇

子筵前北面立祝曰旨酒既滑嘉薦伊脯乃申其服

庶子

云爾服

禮儀有序祭此嘉爵承天之祐皇子筵西拜受爵

賓復西階上東面答拜執饌者薦籩豆皇子升筵末坐

啐酒執爵興筵西跪奠爵再拜執爵興賓答拜皇子升

筵坐奠爵於薦東興立於筵西南面執饌者徹薦賓揖

皇子進升席南面坐賓之贊冠者跪脫進賢冠

庶人脫黑介幘

置於箱櫛畢設纚興復位賓降三等受冕

六品以下爵弁庶人則黑

介幘左執頂右執前詣皇子筵前北面跪冠興復位賓之

贊冠者坐設簪結纓興復位皇子興賓揖皇子適房賓

主俱坐主人贊冠者徹櫛箱入房皇子著衮冕之服

庶子

及六品以下爵弁服庶人絳公服

出房戶西南面立賓主俱興賓揖皇

子進立於席後南面賓詣酒罇所取爵酌酒進皇子筵

前北面立祝曰旨酒令芳籩豆有楚咸加其服

庶子云
兩服

肴升折俎承天之慶福壽無疆皇子筵西拜受爵賓復

位東面答拜

三品以上賓之贊冠者跪設簪結纓興復
位冠者興賓揖冠者適房賓主俱坐冠者

著絳紗服庶人白裙襦服出房戶西南面賓主俱興賓
揖冠者進升席西向坐賓之贊冠者跪脫進賢冠庶人
黑介幘置於櫛箱畢設纓興復位賓降三等受冕六品
受爵弁庶人黑介幘右執頂左執前進冠者筵前東向
立祝曰以歲之正以月之令咸加爾服兄弟具在以成
厥德黃耆無疆受天之慶及跪興復位賓之贊冠者設
簪結纓興復位冠者興賓揖冠者適房賓主俱坐主人
贊冠者徹纓櫛箱及筵入於房又筵於室戶西南向

冠者著冕服六品以下爵弁服庶人絳公服出戶西南面賓主俱興主人贊冠者盥手洗解於房酌醴加柶覆之面葉出房南面立賓揖冠者就筵西面立賓進受醴於室戶東加柶面柄進冠者筵前北面立祝曰甘醴維厚嘉薦令芳拜受祭之以定爾祥承天之休壽考不忘冠者筵西拜受解賓復西階上東面答拜一品以下庶子與親王儀同

執饌者薦籩豆設俎於籩豆之南皇子升筵坐

左執爵

一品以下用
解下倣此

右祭脯醢贊冠者取肺一以授皇

子奠爵於薦西興受郤左手執本坐右絕末祭上左手
嚙之興加於俎皇子悅手執爵祭酒興筵末坐啐酒興
降筵西南面坐奠爵再拜執爵興賓答拜皇子升筵坐

奠爵於薦東興贊冠者引皇子降立於西階之南東南
面初皇子降賓自西階直西序東面立主人降自阼階

直東序西面立賓少進字之曰禮儀既備令月吉日昭

告爾字爰字孔嘉君子攸宜宜之於嘏永受保之曰孟

某甫仲叔季唯其所當皇子曰某雖不敏夙夜祇奉賓

出主人送於內門之外

一品以下賓答拜賓主俱坐冠者升筵跪奠饌於薦東興進北

面跪取脯降自西階入見母進奠脯於薦前退再拜以
出冠者母不在則使人受脯於西階下初冠者入見母
賓主俱興賓降當西席東向立主人降當東序西向立
冠者既見母出立於西階之東南向賓少進字之曰禮

儀既備令月吉日昭告爾字爰字孔嘉髦士攸宜宜之於嘏永受保之曰字某冠者曰某雖不敏夙夜祇奉賓出送於內門外一品以下庶子主人西面請賓曰公辱取脯見母如嫡子餘如親王

執事請禮從者賓曰某既得將事敢辭主人曰敢固以請賓曰某辭不得命敢不從賓就次主人入初賓出皇子東面見諸親拜之皇子答拜

一品以下及冠者西南拜賓之贊冠者答拜庶

子皇子入見內外諸尊於別所賓主既釋服改設席訖

賓贊俱出次立於門西東面主人出門東西面主人揖賓賓報揖主人先入賓贊從之至階一揖一讓升各就

座後立定俱升座會就賓主俱興賓立於西階上贊冠

者在北少退俱東面主人立於東階上西面

一品以下及衆賓降

立於西階下東面庶子同

掌事者受束帛之篚升授主人於東序端

主人執篚少進西面立又掌事者奉幣篚升立於主人

後於幣篚升牽馬者牽兩馬入陳於內門三分庭一在

南北首西上北面賓還西階上北面贊冠者立於左少

退俱北面再拜主人進立於楹間南面賓贊進立於主

人之右俱南面東上主人授幣篚賓受之退復東面位

於主人授幣篚掌事者又以幣篚授贊冠者退復位主人還阼階上北面拜送賓贊降自西階從者迓受幣賓當庭賓東面揖牽馬者從出迓受馬於門外賓降主人降送於大門外之東西面再拜賓退主人入

四品以下於衆賓降

並立於西階下掌事者以幣篚升授主人於序端賓北面再拜主人進立於楹間南面賓進立於主人之右俱南面賓受幣退復東面位主人還阼階北面再拜送賓降自西階從者拜受幣賓出主人送賓於大門外之東西面再拜賓退主人入庶子同親王儀孤子則諸父諸兄戒賓冠之日主人髻而迎賓拜揖讓如冠主冠於阼醴之庶子醴之及禮賓拜送皆如上儀明日見廟者冠者朝服無廟者見祖禰於寢質明贊禮者引入廟南門


中庭道西北賓贊再拜訖引出六品以下見祖禰於正寢冠者公服庶人常服質明張几筵於正寢贊禮者引入至庭北面再拜訖引出五品以上子孫九品以上子冠假用出身品服其三品以上大功以上親冠同八品之服

九品之服

皇子詣闕至次著朝服通事舍人引皇子入詣皇

帝所御之殿至闕閣近臣奏皇帝即御座南向坐近臣引皇子入立於階間北面再拜訖近臣引皇子至皇后殿閣外近臣附奏皇后即御座南向坐司言至閣引皇子入立於階間北面再拜司言引出閣皇子出還第如來儀

通典卷一百二十八



總校官庶吉士臣侍朝

校對官助教臣吳省蘭

謄錄監生臣陳廷桂